

Diaranson 20 September 2023

Email: IslaOnline@gobierno.aw Tel: 528-4952

GOBIERNO DI ARUBA



20
SEPTEMBER
2023


2 AÑA
Gabinete Wever-Croes ||


EVELYN WEVER-CROES
URSELL ARENDS
Xiomara MADURO
DANGUI ODUBER
GEOFFREY WEVER
ROCCO TJON
ENDY CROES
GLENBERT CROES

**TRAHANDO HUNTO DEN MESUN UNION Y CU MAS POSITIVISMO CADA DIA,
PA ARUBA SIGUI RECUPERA.**



“Nos no ta ainda caminda cu nos mester ta, pero nos ta riba e bon caminda”.

PROME MINISTER *Evelyn Wever-Croes*




#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba

Mientras cu RAft ta keda pendiente pa cambionan: ARUBA TA CUMPLIENDO CU E OTRO CONDICIONNAN

Den e conferencia di prensa di Gobierno di Aruba dialuna mainta, Prome Minister Evelyn Wever-Croes a elabora ampliamente riba e condicionnan di Hulanda. Ora cu Covid a bati na nos porta, Gobierno a bay di acuerdo cu 3 condicion di Hulanda pa haya placa pa nos pueblo sobrevivir. Prome Minister a duna di conoce cu dos di e condicionnan aki, ta bayendo bon. E COHO cu despues a bira e acuerdo mutuo cu Gobierno a firma na April ultimo. E acuerdo aki ta den pleno ehecucion. E Landspakket tambe ta bayendo bon. E RAft ainda ta pendiente kico lo bay pasa.

LANDSPAKKET

Pa loke ta trata e Landspakket, Prome Minister a demostra den un grafico adhunto, con e Landspakket ta wordo atendi. Den e grafico por nota tres color, oranje, berde y cora. Gobierno ta publica e raportahenan di ehecucion di e Landspakket cada kwartal y ta manda esaki pa Parlamento di Aruba. Den e raportahenan di cada kwartal, Gobierno ta indica con ta bayendo cu e maneho di Landspakket y cua ta e pasonan cu lo tuma.



ARUBA TA CUMPLIENDO CU E PALABRACIONNAN

Por nota den e grafico cu berde ta indica ora cu e accionnan ta bayendo bon. Oranje ta indica cu e accionnan ta preocupante, y cora ta indica cu no ta bayendo bon. Den e prome columna, por nota cu Aruba ta bayendo bon, tin masha poco den oranje y nada den cora y e gran mayora ta den berde. Esaki ta indicacion cu e reformanan ta bayendo bon manera nan ta



plania. Por nota den e di dos otro columnanan e diferencia entre Corsou y Sint Maarten. Corsou tin un poco mas reto cu Aruba pa atende cu e reformanan. Corsou tin mas na oranje, e tin cora y menos na berde. Sint Maarten ta bayendo tiki miho cu Corsou y cu poco mas reto cu Aruba. Aruba ta cumpliendo cu e palabracionnan haci den e acuerdo mutuo di November 2020.

RAft

Prome Minister a enfatisa cu e unico di e tres condicionnan cu a keda pendiente ta e RAft. Gobierno a negocia cu Hulanda hopi intensamente pa nan logra trece algun cambio den e concepto di RAft cu Hulanda a presenta Aruba na prome instante. Gobierno a bay di acuerdo pa manda e leyman aki pa bay den proceso pa asina Aruba haya conseho di Raad van Advies di Aruba y Raad van State di Hulanda. “Nos tawata sa cu Raad van Advies di Aruba y Raad van State lo duna Aruba rason. Nan a acepta algun cambio. Sinembargo den negosacion cu Hulanda, nan no tawata dispuesto pa bay mas leu y acepta mas cambio den e RAft”, Prome Minister a indica.

Prome Minister a duna di conoce cu manera cu Gobierno di Aruba a premira, tanto di Raad van Advies di Aruba y Raad van State di Hulanda, tawata hopi critico den nan conseho y no ta kere cu e ley di RAft ta e miho instrumento pa Aruba aworaki.

Prome Minister Evelyn Wever-Croes: **GABINETE WEVER-CROES II TA CUMPLI 2 AÑA DEN GOBERNACION**

"Danki pa bo sosten, danki pa bo confiansa"



Diaranson, 20 di September 2023, Gabinete Wever-Croes II ta cumpli 2 aña den gobernacion. Prome Minister Evelyn Wever-Croes a expresa, cu e ultimo 2 añanan aki tabata di hopi reto, pero cu esfuerso, dedicacion y amor, a logra estabilisa e pashent "Aruba", cu na comienso di gobernacion, ainda tabata den gara di e pandemia. Gabinete Wever-Croes II no a logra solamente di estabilisa pais Aruba, sino awor e ta recuperando, y tur instancia local y internacional ta wak e recuperacion aki. Nos no ta ainda caminda cu nos mester ta, pero nos ta riba e bon caminda.

Prome Minister a indica cu e trabounan durante e ultimo 2 añanan no tabata facil. Tur 8 minister di e Gabinete aki a traha y ta trahando duro pa e recuperacion aki yega na cada ciudadano di pais Aruba, y den nan hogar. Danki na tur e trabounan duro di e ministernan, por nota awe, cu e situacion financiero ta bou control, y cu Aruba ta e unico pais den Reino cu ta mirando un surplus.



E gastonan di Gobierno ta bahando, y e entradanan ta subiendo, cual ta yuda pa por paga e compromisonan financiero cu e pais tin. E economia tambe ta creciendo, danki na e pilar economico mas grandi cu ta turismo. Mientras cu inflacion ta bahando. Gabinete Wever-Croes II tambe tin como meta pa duna mas atencion na calidad di enseñansa, y di cuido, y pa pais Aruba sigui desaroya den balanse cu e medio ambiente.

"Tur esakinan ta metanan cu Gabinete Wever-Croes II lo mantene y mehora den e siguiente aña di gobernacion. Logronan cu apesar di tur e retonan cu a bin den nos caminda, nos Gobierno ta hibando pais Aruba den e bon caminda. Mi ta sigur cu padilanti tambe nos lo encontra retonanan nobo na caminda, pero mirando e experiencia cu nos a gana e ultimo dos añanan aki, y e amor y dedicacion cu cada minister ta pone den nan trabou, mi ta sigur cu nos lo enfrenta nan cu balentia, y lo logra surpasa cada un di nan tambe. Mi ta orguyoso di e Gabinete aki y tur loke nos a logra pa nos dushi baranca. Mi ta gradici henter comunidad di Aruba pa nan sosten y nan confiansa", Prome Minister a expresa.



“Dos aña di liderazgo determina pa Aruba”.

MINISTER *Ursell Arends*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



INTEGRIDAD GUBERNAMENTAL TA UN TOPICO CU NOS MESTER POR DISCUTI ABIERTAMENTE, TAMBE DEN CONSEHO DI MINISTER



Durante juli 2023, Consejo di Minister a bay di acuerdo cu un proposicion for di Ministerio di Integridad pa periodicamente tene sesionnan den Consejo di Minister tocante integridad gubernamental. E sesionnan lo tuma luga cada kwartaal.

E prome sesion a tuma luga dia 19 di september 2023, hunto cu conseheronan Carlos Guiamo y Ruthlyn Lindor. Despues di un introduccion cortico, e reunion a procede na un forma hopi interactivo.

Durante e mesun reunion den Consejo di Minister tambe a delibera riba algun punto di e concepto pa un codigo di conducta pa minister. E codigo di conducta ta trata un variedad di tema manera nevenfuncies, conflicto di interes, biahe di trabou, con pa anda cu regalonan, y mas.

E siguiente sesion den Consejo di Minister tocante integridad gubernamental ta plania pa december 2023. Pa loke ta trata e concepto pa un codigo di conducta pa minister: esaki lo wordo finalisa riba termino corto door di bureau di Minister di Integridad den colaboracion cu Bureau Integriteit Aruba.



CUMINSA PREPARA PA BAKI DEN BARIO Y SEPARA BO DESPERDICIO

GREEN WASTE

mata
blachi
taki
yerba

METAL

frishider
stoof
wasmashin
dryer
airco
cabel
waya
pijp
mueble di metal
parti di motor
bais
zim
heki
herment
pomp
bentana
porta

e-WASTE

TV
computer
laptop
mouse
keyboard
monitor
printer
telefon
celular
radio
speaker
camara
consola di wega

CONSTRUCCION

cement
bloki
santo
pavers
concret

BULK/MIXED

mueble
corchon
tegel
pot di wc
wasbak
pañã
sapato
tubo di pvc
ceramica
porcelina
plastic
rubber
palo
plywood
disk
cd



TRASHTOCASHARUBA.ORG/LIMPILIMPI



Appreciation Week
Danki pa boso dedicacion!
11 - 15 september 2023



“Un maneho marca pa
resiliencia, unidad,
y positivismo solido”.

MINISTER *Xiomara Maduro*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



Demostrando cu no tin limite ora cu bo kere den bo mes **MINISTER MADURO A RICIBI BRAINER LAMPE,** **DISJONRICK JACOBS Y GERALD MORETA NA** **NAN YEGADA FOR DI MARYLAND**

Esaki despues di a finalisa IRONMAN 140.6 exitosamente



Ayera, Minister di Finansa y Cultura, representando Minister President y Minister di Deporte, tabata na Aeropuerto Internacional Reina Beatrix pa asina ricibi e team cu a representa nos Pais den e full IRONMAN 140.6 na Maryland. Ta trata aki di e team cu ta consisti di Brainer Lampe, Disjonrick Jacobs y Gerald Moreta cu a sa di marca historia, poniendo Aruba su nomber resona un biaha mas den un di e eventonan di mas grandi y popular na mundo pa locual ta trata e deporte di triathlon. E duo aki ta bira e di 14 na mundo pa participa den IRONMAN di e forma cu nan a haci esaki. Sin duda, un orguyo pa nos Pais y pa tur esnan cu ta sigui e team aki di cerca, apoyandonan desde cu nan a cuminsa algun aña atras pa awo.

Na e ocasion aki, Minister Maduro a expresa su gratitud pa e team completo, pero sigur tambe na tur esnan cu ta sostenenan den e deporte aki. Minister Maduro mes ta un fiel fanatico di nan y ta sigui nan pasonan di cerca. ‘Danki pa kere den boso mes y danki pa kere den Aruba’ tabata palabra final di e mandatario.

Den nomber di Gobierno di Aruba, Minister Maduro ta gradici Brainer, Disjonrick y Gerald pa a representa nos Pais dignamente aya na Maryland y pa a laga e nomber di nos Pais resona atraves di IRONMAN y ta deseanan tur clase di exito den nan futuro participacion.





"Solamente ta spera
nos un futuro mas briyante".

MINISTER *Rocco Tjon*



#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba

A BISHITA CENTRO DI BARIO DAKOTA DEN CUADRO DI PROYECTO VEILIGE BARIO'S



Minister di Husticia y Asuntonan Social sr. Rocco Tjon, a bishita Centro di Bario Dakota, den cuadro di proyecto Veilige Bario's y a ricibi un recorrido amplio for di e directiva di Centro di Bario Dakota, caminda a logra wak e diferente actividad cu ta wordo brinda. Manera ta conoci, un di e pilarnan di e proyecto aki ta pa re-activa e diferente centronan di bario y pa e motibo ey a percursa pa restructura e manera con e centronan di bario ta ricibi e subsidio. Ministerio di Husticia y Asuntonan Social a sera un asociacion cu CEDE Aruba, y ya caba e movicionnan cu tin andando den cada centro di bario ta uno riparabel.

Diariamente, centro di bario Dakota ta ricibi alrededor di 150 mucha cu ta bishita e centro di bario y ta participa na e diferente actividad cu nan tin pa ofrece. Notabel ta, cu e parti di futbol y deporte en general tin hopi acohida como tambe e parti di arte y baile. Banda di esaki, preparacionnan ta tumando luga pa loke ta e parti infrastructural pa asina construi un "Youth Corner", caminda ta bay brinda diferente otro tipo di actividad na e muchanan, tambe lo tene cuenta cu e parti cibernetico, lo bay tin un parti dedica na esaki, pa asina e muchanan por participa na e parti aki.

Pa loke ta e aspecto di deporte, e parti di basketball tambe ta hayando su atencion, cual ta un inversion di ministerio di

Enseñansa y Deporte. Centro di Bario Dakota lo bay ta e prome centro di bario cu ta bay tin un veld di basket pues lo ta e prome cu un veld di basket cu ta cumpli cu tur e regulacionnan pa loke ta trata e Federacion Internacional di Basketball (FIBA).

Banda di esaki, a haya un bista tambe di tur loke ta wordo brinda na e muchanan pa loke ta e parti social. Adicionalmente, a toca e parti di educacion, cual ta un parti hopi importante di cual lo bay percursa pa brinda mas atencion den e centro di bario pa cu esaki. Asina por bisa, cu ta brinda e parti di liderazgo personal na e muchanan, a traves di deporte, arte y baile, cual ta forma nos muchanan riba e tematica aki.

E mandatario a combersa breve cu e supervisor di actividad cual ta algo nobo cu a traves di e restructuracion a bira posibel. Ta asina cu a traves di CEDE Aruba a contrata supervisoran di actividad pa e diferente centronan di bario, di cual awe por wak e frutonan di esaki.

Por ultimo, a gradici colega minister di Enseñansa y Deporte sr. Endy Croes pa cu e inversionnan haci, tambe a manda palabranan di pabien na e directiva di Centro di Bario Dakota cu ta haciendo un tremendo trabou. Pues mas y mas ta percursa pa por tin mas actividad den e centronan di bario.

Continuacion POTRETNAN DI BISHITA NA CENTRO DI BARIO DAKOTA....





“Unidad y positivismo
ta sigui alumbrá nos
caminda.”.

MINISTER *Endy Croes*

#ArubaRecupera
#UnidadDenAccion
#gabinetewevercroes2
#unionypositivismo
#cuamorpaaruba



E MAESTRONAN RESORTA BOU DI SCOL DI DPS A HAYA TRAINING PA E INTRODUCCION DI PROGRAMA DI EDUCACION SEXUAL, BIBA AMOR

Dia 18 pa 23 di september 2023, a tuma luga capacitacion di e maestronan en conexion cu introduccion di programa di educacion sexual, Biba Amor. Maestronan di klas 5 y 6, cabesante, ib'ers y docentenan di Movecion di Salud a asisti na un dia di estudio. E programa ta consisti di un “lespakket”, cu ta enfoca pa amplia e conocimiento encunto e fasenan di desaroyo, entre otro, adolescencia, desaroyo sexual na nivel di e alumno, anticonceptivo y malesa cu por transmiti sexualmente. Tambe a enfatisa riba e bienestar social emocional di e alumno, riba habilidad social y actitudnan pa haci escogencianan consciente riba tereno sexual.

SKOA y SPCOA a introduci e metodo Biba Amor desde basta tempo atras. Minister Endy Croes a mira e gran importancia di educacion sexual na scol y a tuma e decision pa implementa e metodo Biba Amor tambe na e scolnan cu ta resorta bou di DPS. Lo implementa e metodo Biba Amor pa e alumnonan di aña 5 y 6 di scol basico. Banda di esaki, tabatin un anochi informativo pa mayor, unda cu a duna splicacion amplio di e topiconan cu ta bay trata den e metodo y alabes duna e mayornan espacio pa haci pregunta. Minister Endy Croes ta gradici tur esnan cu a contribui den e proyecto educativo aki na bienestar di tur mucha y hoben di Aruba.



FALTA 2 DIA MAS PA POR PARTICIPA DEN E CONCURSO DI PINTAMENTO CACHO DEN CURA

E aña aki ta di cinco aña consecutivo cu ta organisa un Concurso di Pintamento, pues Gobierno di Aruba ta celebrando su prome lustro pa esaki.

E meta di e concurso ta pa conscientisa specialmente nos muchanan tocante Aruba su Ley di Cacho. A traves di pintura e muchanan por expresa y siña mas tocante e ley aki. E aña aki e muchanan mester pinta un of mas cacho den cura. Minister di Enseñansa Endy Croes a dicidi di sigui e liña di e campaña cu Cuerpo Policial a inicia na juli: Cacho Den Cura, Ta Ley E Ta.

Participacion ta completamente gratis y tur mucha cu ta bay scol basico por participa. Si abo como mayor sa cu bo yiu no a ricibi e formulario na scol, por download e formulario via www.specialprojectsaruba.org tambe pa print pagina 2 (e print mag ta blanco cu preto); pagina 1 ta e pagina di informacion. E pintura mester ta na color y pinta door di e mucha mes, pues sin ayudo di un mayor. Ta importante pa pone informacion di e alumno riba e formulario di participacion pa asina por comunica cu e alumno cu a gana.

Diabierna, dia 22 di september 2023, ta e ultimo dia cu por entrega e formularionan. Por entrega e formularionan na Bestuurskantoor Oranjestad, na HBK San Nicolas of na e MFA mas cerca.

Lo anuncia e ganadonan dia 4 di oktober 2023 riba e pagina di Facebook di Gabinete Wever-Croes. E muchanan cu gana lo haya un invitacion pa ricibi nan regalito despues di vakantie di

october.

Gobierno di Aruba ta invita tur mayor y maestro pa stimula e muchanan cu ta bay scol basico pa participa. Minister Endy Croes ta spera di por conta cu un cantidad record e aña aki. Ban nos tur inculca e atencion debido di nos Ley di Cacho den nos muchanan.

Informacion di Participante

Number y Fam: _____
Fecha di Nacemento: _____ Edad: _____
Scol: _____ Klas: _____
Number di Telefon di Mayor: _____
Un number faborito pa bo cacho: _____

CONCURSO di Pintamento 2023
Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: specialprojectsaruba.org
3. Tarea 1: Duna bo cacho un number
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (1) pintura pa cada participante; entrega bo formulario no mas tarda cu dia 22 di september 2023 na Bestuurskantoor Oranjestad, na HBK San Nicolas, of na e MFA mas cerca dibo
7. E ganadonan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadonan cu lo wordo entrega fin di oktober

Area pa pinta

GOBIERNO DI ARUBA



**Nos no ta ainda caminda cu nos mester ta,
pero nos ta riba e bon caminda.**

Dos aña di liderazgo determina na Aruba.

Un maneho marca pa resiliencia, unidad, y positivismo solido.

Den cara di reto sin precedente, nos a demostra cu union ta haci forza.

Hunto nos a demostra cu nos por supera tur reto.

Solamente ta spera nos un futuro mas briyante.

Unidad y positivismo ta sigui alumbrá nos caminda.

Y hiba nos na prosperidad y bienestar pa tur hende.

**#ARUBARECUPERA #UNIDADDENACCION
#GABINETEWEVERCROES2 #UNIONYPPOSITIVISMO
#CUAMORPAARUBA**